

ՔԱՐՈՉԽՈՍԱԿԱՆ

Տ. ՆԵՐՍԵՍ ԱՐՔԵՊԻՍԿՈՊՈՍ ՊՈԶԱՊԱԼՅԱՆԻ ՔԱՐՈՉ՝ ԽՈՍՎԱԾ Ս. ԷԶՄԻԱԾՆԻ ՄԱՅՐ ՏԱՃԱՐՈՒՄ ԾՆՆԴՅԱՆ ԵՎ ԱՍՏՎԱԾԱՀԱՅՏՆՈՒԹՅԱՆ ՃՐԱԳԱԼՈՒՅՑԻՆ ՄԱՏՈՒՑՎԱԾ Ս. ՊԱՏԱՐԱԳԻՆ

(5 հունվար 2006 թ.)

«Յանուն Հօր եւ Որդւոյ եւ Հոգւոյն Սրբոյ. ամէն»:

«Ծնաւ նոր արքա ի Բեթղեհեմ քաղաքի, որդիք մարդկան օրհնեցէք, զի վասն մեր մարմնացաւ»: Ծնավ նոր արքան Բեթղեհեմ քաղաքում, ով մարդիկ, օրհնեցէք, փառք տվէք, որովհետև Նա մեզ համար ծնվեց:

Բեթղեհեմ քաղաքի շրջակայքում իրենց հոտը արածեցնող հովիվները գիշերվա կեսին տեսան երկնքում փայլատակող աստղը, և աստղը այդ ճանապարհը ցույց տվեց, որպեսզի երեք մոզերը՝ Մելքոնը, Գասպարը և Բաղդասարը, հասնեին արևելքից դեպի Բեթղեհեմ: Նրանք Երուսաղեմում Հերովդես արքային հանդիպեցին և հարցրին, թե ո՞ր է ծնվող նոր արքան, այսինքն՝ Աստվածորդին, Էմմանուելը: Եվ արքան զարմացավ, իր խորհրդականներին հարցրեց և պատվիրեց մոզերին չարակամությամբ. գնացեք-գտեք ծնվող նոր արքան և ձեր վերադարձի ճանապարհին ինձ հանդիպեք և հայտնեցեք նրա ծննդյան տեղը:

Մինչ մոզերը գիշերվա կեսին աստղի լույսով առաջնորդվում էին դեպի Բեթղեհեմ, հովիվները, որոնք արածեցնում էին իրենց ոչխարները, գեղեցիկ մի տեսիլքի արժանացան: Այդ տեսիլքը փառավոր մի տեսիլք էր, որում բացվեց աստվածային ճշմարտությունը, բացահայտվեց երկինքը, լույսի հեղեղներով աշխարհ իջան հրեշտակները՝ գեղեցկորեն երգելով, շեփորների հնչումով, զանգակների դողանքով: Մարդկությանը այս պարզ հովիվների միջոցով հայտնվեց այն փառավոր հրաշքը, որ տեղի ունեցավ Բեթղեհեմի մեջ, մսուրի մեջ և ոչ թե արքայական պալատների մեջ: Եվ հրեշտակները ավետեցին հովիվներին՝ ասելով. «Փառք ի բարձունս Աստուծո և երկրի վրա խաղաղություն և մարդկանց միջև հաշտություն, համերաշխություն»:

Քիչ անց աներևույթ եղան հրեշտակները ամբողջ իրենց շքախմբով: Հովիվները մտածեցին, թե այս տեսիլքը ի՞նչ տեսիլք էր: Երկնքում փայլատակող գեղեցիկ ու լուսավոր այն աստղը արդյո՞ք նշանն էր Հիսուսի՝ մեր Տիրոջ ծննդյան: Եվ գնացին Բեթղեհեմ, տեսան այնտեղ մանուկը խանձարուրով պատված մոր գրկին և Հովսեփը՝ հայրը, և մսուրի մեջ գտնվող կենդանիները: Այս տեսարանի մանրակերտը կարող էր դուրսը տեսնել, երբ էլնեք եկեղեցուց, նայեցեք ձեր շուրջը և այնտեղ կտեսնեք մի մսուր, որը ներկայացնում է Քրիստոսի ծննդյան այրը:

Ո՞վ էր, սիրելի հավատացյալներ, ծնվող Փրկիչը: Փրկիչը Աստվածորդին էր, ինչպես Եղիա մարգարեն հինգ հարյուր տարիներ առաջ Քրիստոսի ծննդից մարգարեացավ և ասաց. «Ահա կոյսն յղասցի եւ ծնցի որդի, եւ կոչեսցեն զանուն Նորա Եմմանուէլ» (Եսայի Է 14): Եվ այնուհետև ժամանակի լրումին Սուրբ Կույսը Սուրբ Հոգու միջոցով

հղանալով ծնեց աշխարհի Փրկչին: Մարդկությունը խավարի մեջ խարխափում էր, մարդկությունը ամբողջ իր պատմության ընթացքին փնտրում էր, թե ո՞վ է ինքը, ուր-կե՞ն կուգա և ո՞վ է Աստված, որ Արարիչն է տիեզերքի:

Մարդիկ սնոտի հավատալիքներին հետևեցին, անգամ կենդանիներին աստվածացրեցին՝ ենթադրելով, որ նրանք աստվածներ են, բայց Աստված կամաց-կամաց, դարերի ընթացքում պայծառացրեց մարդկության միտքը, որպեսզի ճանաչեն Աստծուն, և Աստված երբ ճանաչվեց մարդկության կողմից, Աստված որպես նշան մարդկության հետ հաշտության, Իր Որդուն ուղարկեց աշխարհ, որ ծնվեց Սուրբ Կույսից, եկավ մարդկությանը քարոզելու աստվածային ճշմարտությունները, Իր վարդապետությունը փրկության, և փորձեց Աստծուն հաշտեցնել մարդու հետ:

Փառք ի բարձունս Աստուծո և երկրի վրա խաղաղություն, բայց մարդկանց մեջ հաճությունը շատ դժվար է կյանքում իրականանում, նաև շատ դժվար է մարդկության մեջ խաղաղության հիմնարկումը, շատ դժվար:

Տեսեք, մոտ քսան դար է անցել, և մարդկությունը տվայտում է, փորձում է խաղաղություն գտնել, հաշտություն գտնել, թշնամությունը չի վերանում մարդկանց միջից, և ցավոք մենք նա, որպես ժողովուրդ, մեր հարցերը ունենք, մեր խնդիրները ունենք քաղաքական իմաստով, և մեր մաղթանքը պիտի լինի հատկապես 2006 թվականի սեմին, որ Աստված լսե մեր ձայնը և Իր խաղաղությունը պարգևե մեր ժողովրդին: Թող հաշտություն լինի աշխարհի վրա: Այսօր, երբ Սուրբ Ծննդյան Ճրագալույցի երեկոյան այս Սուրբ Պատարագը մատուցում ենք, մենք հաղորդվում ենք մեր Տիրոջ՝ Հիսուս Քրիստոսի հետ Հայաստանյայց Եկեղեցվո ծոցին մեջ և մաղթում, որ նորածին Փրկիչը մեզ պարգևի այն, ինչ որ մեր ժողովուրդը ցանկանում է, այն, ինչ որ մենք ցանկանում ենք առաջիկա տարվա ընթացքում իրականացնել:

Մեր սրտագին մաղթանքը այն է, որ մեր ժողովուրդը խաղաղության մեջ ապրի, իր հայրենասիրությունը չպակասի, թող չլքի իր երկիրը և հեռանա, մնա՛, տե՛ր դառնա իր հողին, հողը տիրոջ պետք ունի, և մենք պարտավոր ենք մեր հողի տերը ըլլալ, որովհետև շուրջ հինգ հազար տարիներ, Նոյյան շրջանից սկսած և շարունակված Հայկ Նահապետով, մենք այս հողի տերն ենք եղել: Այսօր մեր մաղթանքն է, որ նորածին Փրկիչը այցելի մեր ժողովրդին, նորածին Փրկիչը մեր միաբանության, մեր ժողովրդին, Հայոց Հայրապետին երկար կյանք պարգևե: Քաջառողջության և գեղեցիկ իդեալների իրագործման մի տարի դառնա այս տարին ոչ միայն Հայոց Հայրապետի համար, այլ նաև բոլորիս համար, որ հավատքով եկած ենք այստեղ իրար ողջունելու, իրար սիրով ողջունելու և ասելու. «Քրիստոս ծնաւ եւ յայտնեցաւ, մեզ եւ ձեզ մեծ աւետիս»:

Միասին ասենք «Քրիստոս ծնաւ եւ յայտնեցաւ, մեզ եւ ձեզ մեծ աւետիս»: Թող նորածին Փրկիչը ամեն մեկիս այցելե, ամեն մեկիս դժվարությունները վերացնե և մեր կյանքի ճանապարհը լուսավոր դարձնե ի փառս Յուր անվան՝ Հոր և Որդվո և Հոգվոյն Սրբո, այժմ և միշտ և հավիտյանս հավիտենից, ամեն: